

Seri Paduka: Tambah tabungan, jangan naikkan harga barang

um- 2/6/2007

KUALA LUMPUR 1 Jun - Yang di-Pertuan Agong, Tuanku Mizan Zainal Abidin, yang memberi perhatian terhadap kenaikan gaji dan kadar pencen lebih tinggi untuk kakitangan awam, malam ini menasihati mereka yang menikmati tambahan pendapatan itu agar meningkatkan tabungan selain mengingatkan peniaga supaya tidak mengambil kesempatan menaikkan harga barang.

Dalam titah ucapan sempena ulang tahun Hari Keputeraan Rasmi baginda esok, Seri Paduka berharap tambahan pendapatan itu dapat menyuntik semangat baru bagi seluruh warga perkhidmatan awam dalam menambah kualiti dan meningkatkan produktiviti serta mutu perkhidmatan mereka.

"Beta berharap mereka yang mendapat nikmat dengan tambahan pendapatan ini akan merancang perbelanjaan dengan lebih realistik serta meningkatkan tabungan demi jaminan masa depan," titah Seri Paduka yang disiarkan menerusi radio dan televisyen malam ini.

● Senarai penerima pingat - Muka 12

Yang di-Pertuan Agong bertitah, tambahan pendapatan kepada anggota perkhidmatan awam bagaimanapun tidak akan memberi makna sekiranya golongan peniaga menaikkan harga barang keperluan pengguna.

"Beta ingin mengingatkan para peniaga agar tidak mengambil kesempatan menaikkan harga barang. Bila berlaku kenaikan harga seluruh rakyat akan mendapat kesan buruk dan sesungguhnya kenaikan gaji tidak akan memberi sebarang makna," titah Seri Paduka.

Tuanku Mizan turut melahirkan penghargaan serta menyokong penuh komitmen dan kesungguhan Perdana Menteri, Datuk Seri Abdullah Ahmad Badawi dalam usaha membanteras rasuah dan salah guna kuasa serta meningkatkan integriti.

"Beta berharap dan menyeru semua anggota perkhidmatan awam serta rakyat Malaysia agar bersatu, bekerjasama dan menyokong penuh usaha yang digagaskan ini.

"Adalah menjadi hasrat beta untuk melihat rasuah dan penyelewengan dihapuskan agar rakyat Malaysia menjadi warga yang bermaruah dan dihormati," titah Seri Paduka.

Seri Paduka mengucapkan syukur kera-



TUANKU Mizan Zainal Abidin dan Abdullah Ahmad Badawi bersama jemaah membaca surah yasin pada majlis bacaan yasin, tahlil dan doa selamat sempena ulang tahun Hari Keputeraan Rasmi Yang di-Pertuan Agong di Masjid Negara, Kuala Lumpur, malam tadi.

- Gambar SHAFUDIN MOHD. NOR

na di bawah kepimpinan Perdana Menteri, negara kini berada dalam keadaan sejahtera serta makmur dan kedudukan ekonomi negara begitu memberangsangkan dengan Indeks Komposit Bursa Malaysia menunjukkan prestasi menggalakkan dan mencapai paras tertinggi dalam sejarah.

Yang di-Pertuan Agong gembira melihat segala program dan inisiatif yang direncanakan di bawah Rancangan Malaysia Kesembilan telah mula mengatur langkah setelah lebih setahun dilancarkan dan berharap kerajaan akan terus komited serta gigih melaksanakan apa yang dirancang.

Sempena sambutan kemerdekaan ke-50 tahun ini, Tuanku Mizan menyeru rakyat agar menghayati sejarah perjuangan kelahiran Malaysia yang penuh dengan cabaran serta pahit getir demi membebaskan negara daripada telunjuk penjajah yang sekian lama mencengkam dan melemahkan jiwa anak bangsa.

Seri Paduka bertitah, kemerdekaan yang membawa erti kebebasan yang mutlak amat besar nilainya, namun sebahagian besar rakyat yang lahir selepas merdeka tidak dapat memahami dan menjiwai pahit getir serta susah payah yang terpaksa dilalui oleh generasi terdahulu.

"Jika kita tidak menghayati sejarah perjuangan kelahiran negara ini kita mungkin tidak dapat menghargai kebebasan yang kita miliki. Justeru fahami, hayati dan jiwailah sejarah perjuangan kemerdekaan ini agar erti kebebasan ini dapat benar-benar kita hayati dan hargai," titah Seri Paduka.

Tuanku Mizan juga melahirkan harapan baginda untuk melihat bukan sahaja perpaduan rakyat berbilang kaum di negara ini terus terpelihara tetapi bertambah kukuh dan utuh merentasi semua perkara.

Seri Paduka bertitah, rakyat Malaysia berbilang kaum perlu memanfaatkan segala kesempatan yang ada untuk lebih bergaul,

mengenali dan memahami agar lebih menyayangi serta melakukannya dengan penuh kemesraan, keikhlasan dan kepercayaan, tanpa rasa curiga baik di sekolah, pejabat, tempat awam dan di mana sahaja.

Seri Paduka akui bukan mudah untuk rakyat berbilang bangsa dan agama mendiami sebuah negara dan berkongsi segalanya dalam keadaan aman, rukun dan damai.

"Namun rakyat Malaysia berjaya membuktikan bahawa kepelbagaian bangsa, agama dan budaya yang kita miliki bukanlah satu halangan dan masalah, sebaliknya adalah satu keunikan yang membina kekuatan kita bersama," titah Seri Paduka.

Mengenai taraf negara maju seperti yang termaktub dalam matlamat Wawasan 2020, Seri Paduka bertitah, dalam mencapai matlamat tersebut, persaingan peringkat global yang perlu dihadapi rakyat begitu kompetitif dan mencabar.

- Bernama